

ياقف المتفرجين ياخذو نفس كبير و كي يخرجوه يقعدوا بالشوية على مراحل فوق الكرسي

متفرج: نتمنى الحزن يفرقك

متفرج: ممكن اما كيف تصفى الدنيا

متفرج: تصفى الدنيا كيف تصفى القلوب

متفرج: معناها بش نبقى حزين و مش بش يتعدا في نقب بدني ضو الدنيا

متفرج: يقولوا الي كيف تصفا الدنيا و تصفى الشمس

متفرج: ضيها يسري في بدناتنا كيف الماء

متفرج: شبيه الماء

متفرج: يقولوا زادة الي بدن الانسان ب كله ماء

متفرج: كيفاش

متفرج (يعني): كيفما يرجع الفرطو

متفرج (يعني): للنار اللي تحرقوا

متفرج(يعني): نرجعك حاليير و مهني

متفرج(يعني): انت و قلبك اقوى مني

متفرج (يصفق)

متفرج(يزغرطة)

متفرج: تحن انت للماء

متفرج: كي نعطش نشيح نليح نحن

متفرج: زعمة علاش ؟ مش تخلقنا مالتراب

متفرج: لا

متفرج: تخلقنا في كرش امنا

متفرج: كريشة معبية ماء و هواء

متفرج: و على هذاكه الروح تحن للسماء الي معبيه هواء و تولد ماء

متفرج: اكسجين و مطر

متفرج: كيف انا تخلقنا مالماء ، الماء كيفاش يجي؟

متفرج: موجود في باطن الارض اما بالقدرة يهبط علينا مالمسحاب

متفرج: و السحاب كيفاش يجي

متفرج: يقولوا الي قبل ما تصفى القلوب لازم عاصفة طوفان يهزها سافاها على اعلاها

متفرج: تتلم البشرية تحزن عاللي وصلتلوا

متفرج: على شنوة

متفرج: اتلفت على جنبك و وراك و حل عينيك

متفرج: مجتمع هزه واد انعدام خلق و اخلاق

متفرج: تحزن على كرهننا

متفرج: على جرايمنا

متفرج: على فراقنا

متفرج: على هروبنا عاللي يحبونا

متفرج: علي خلانا و رحل

متفرج: شفتك ليلي قاعد تستنى عالصخر

متفرج: شفتك تبكي عالصخر

متفرج: ماتخافش على عويناتك

متفرج: مناش ؟

متفرج: تحكيليا جدائتي كل ما تبرد و يقص الضو و نحنا راكشين على ضو شمعته على الي خلاها ولدها و حرق بقت

اتبع في ريحته الي غطاها ريحه الملح الي خارج مع الموجه و هي قاعدة على نفس الحجرة تستنى و تبكي لين نشحت عيناها

متفرج: لين فرغت عيناها مالسوايل الي فيها كل  
متفرج: اي كان تبكي من غير ما توقف سبعة ليالي على بعضها الماء الي مصيطو من صرتك و انت في كرش امك  
تشيح منه الماء الكل  
متفرج: عينيك تنشح لين تتعفن  
متفرج: يوكلها الدود  
متفرج: و هي تستنى في الحبيب يبوسها  
متفرج (يغني): بلاش تبوسني في عينا دي البوسه في العين تفرق  
متفرج: و الي بطبيعته تفارق  
متفرج: فيبالك بكيتني  
متفرج: فيبالي لحمي شوك  
متفرج: فيبالك عبيتلي مخ قلبي دموع  
متفرج: اشبيهم الدموع؟  
متفرج: الدموع الي بدني فورت  
متفرج: غفقت  
متفرج: دخان سرح متبخر من كل نقبة من بدني  
متفرج: و الدموع باقي تحاول تهرب  
متفرج: مالفقتش مهرب  
متفرج: تمشيش تنفرقع علينا  
متفرج: شخص  
متفرج: كان نتفرقع عاصفة غش تهز الدنيا طوفان سافاها على اعلاها  
متفرج: تزهى الدنيا  
متفرج: و نزهى معاها  
متفرج: نجيك نفلك هاو فارقني الحزن  
متفرج: تسالني كيفاش  
متفرج: نحكيك قصتي على مسارب الماء  
متفرج (يغمض عينيه و ياقف يتنفس نفس عميق، يخرج النفس و يقول): كيف غمضت عينا و خذيت لحظة مالدنيا و  
تنفست شفت الشئ هابط يجري من فوق الاجبال  
متفرج: عالتربة  
متفرج: عالغيبة  
متفرج: عالياجور  
متفرج: عالشرشور  
متفرج: عالبقر و النحل  
متفرج: عالزهور و العصفور  
متفرج: على الخدود سيور سيور  
(متفرجين يتنفسوا نفس عميق و يعاودوا يقولوا بصوت عالي كاينهم جوفة):  
عالتربه عالغيبة  
عالياجور و الشرشور  
عالبقر و النحل  
الزهور و العفور  
على الخدود سيور سيور  
( يبقوا يعاودوها اكثر من مره لين يقرر متفرج يقص عليهم بالقوي يقول ) : نحبك  
متفرج: توحشتك  
متفرج: هاني جيت تفكرتني  
متفرج: نشم في لحمك هو هو

متفرج: عنقني بالله عنقني ماعادش نجم

متفرج: عنقني وليت نرعرش

متفرج: اكبس عليا لا نطيح من يدك

متفرج يقوم يطلب من اي واحد يحب يعنقوا يقوم يعنقوا و كان حشم يقولها يقوم من بلاصته و يستنى

(كان ما يعنقوا حد او اكثر من واحد ما يكملش النص)

(بقية المتفرجين يتنفسوا بعمق و يخرجوا اصوات و همهمات صغار)

(هو ما باقي معنقين بعضهم للخر)

متفرج(يغني) : يا نجوم الليل الضواية نا عندي معاك الف حكاية و كلام طويل